

Կարծիք

Բենիկ Վարդանի Վարդանյանի «Հայկական լեռնաշխարհի հյուսիսարևելյան հատվածի բնակչության սոցիալական կազմը և թաղման ծեսն ըստ ուշ բրոնզ և վաղերկաթեդարյան դամբանային համալիրների» Է.00.03 «Հնագիտություն» մասնագիտությամբ պատմական գիտությունների թեկնածուի գիտական աստիճանի հայցման ատենախոսության մասին

Հրապարակային պաշտպանության ներկայացված Բ.Վարդանյանի աշխատանքը նվիրված է Հայաստանի և Հարավային Կովկասի հնագիտության ավանդական, բայց և այնպես արդիական թեմային, որի նկատմամբ հետաքրքրությունը պայմանավորված է մի շարք օբյեկտիվ գործոններով: Առաջին հերթին, դա ուշ բրոնզ – վաղ երկաթեդարյան հնագիտության աղբյուրագիտական հենքի վիճակն է, որն առավելապես ներկայացված է դամբարանային համալիրներով: Բացի այդ, հատկապես այս ժամանակահատվածի համար առավելագույնս տեսանելի են կոմպլեքսային հասարակության և վաղ պետական կազմավորումների ձևավորման սոցիալ-տնտեսական գործընթացները: Դրանով էլ պայմանավորված հրապարակի վրա ունենք զգալի քանակության ուսումնասիրություններ, որոնցում այս կամ այն չափով շոշափվում են ներկայացված թեմայի տարբեր ասպեկտները: Այնուամենայնիվ, դրանց միայն մի մասն է մեթոդապես բավականին հիմնավորված: Այս տեսանկյունից, Բ.Վարդանյանի ատենախոսական աշխատանքը առանձնանում է ինքնատիպությամբ, հետաքրքիր է և արժանի բարձր գնահատանքի:

Աշխատանքի կարողվածքը.

Աշխատանքի ընդհանուր ծավալը 288 էջ է: Այն բաղկացած է բուն շարադրանքից (180 էջ), գրականության տպավորիչ՝ 423 անուն պարունակող ցանկից, պատկերների և աղյուսակների հավելվածներից: Աշխատանքի հիմնական բովանդակությունը ամփոփված է երեք գլուխներում՝ Գլուխ 1. Հին Հայաստանի ուշ բրոնզ և վաղերկաթեդարյան թաղման ծեսի վերակազմության խնդիրները, Գլուխ 2. Ուշ բրոնզ և վաղերկաթե-

դարյան հասարակության սոցիալական կազմի ուսումնասիրման խնդիրները, Գլուխ 3. Ուշ բրոնզ և վաղերկաթեդարյան թաղման գույքի ուսումնասիրության խնդիրները, որոնք բաժանված են բաժինների և ենթաբաժինների: Ընդհանուր առմամբ, գլուխներն ու բաժինները ընդգրկում են հետազոտության գրեթե բոլոր կողմերը, բայց դրանց կարգը կարծես թե միշտ չէ, որ տրամաբանական է: Այսպես օրինակ, մի շարք գտածոների գործառույթները և դրանց ծիսական իմաստը ներկայացվում է երրորդ գլխում, մինչդեռ արդեն իսկ երկրորդ գլխում վերջիններիս կրողները ստանում են այս կամ այն կարգավիճակը, որը սակայն շատ դեպքերում պայմանավորված էր հատկապես ուղեկցող նյութի նշանակությամբ:

Իմ կարծիքով, “Ուսումնասիրության կատարման մեթոդաբանական հիմքը”, և, միգուցե՝ “Հիմնախնդրի ուսումնասիրության վիճակը” ներածության բաժինները հարկավոր էր ներկայացնել առանձին գլխում: Բոլոր դեպքերում, “Հիմնախնդրի ուսումնասիրության վիճակը” բաժինը պետք է նախորդի “Ուսումնասիրության կատարման մեթոդաբանական հիմք”-ին և ներառի նաև նախորդ ուսումնասիրությունների մեթոդաբանության մանրամասն քննական վերլուծությունը:

Աղբյուրագիտական հենքը

Ինչպես վերը նշվեց, Հայաստանի և Հարավային Կովկասի ուշ բրոնզ – վաղ երկաթեդարյան հուշարձանների հետազոտման առկա վիճակը օբյեկտիվորեն բոլոր անհրաժեշտ նախադրյալներն է ստեղծում հեղինակի կողմից առաջադրված խնդրի հաջող իրականացման համար: Միևնույն ժամանակ, պեղումների տարբեր մեթոդները, ոչ լիարժեք հրապարակումները և, հաճախ, անհրաժեշտ տեղեկատվության բացակայությունը, բնականաբար, ստիպում են աղբյուրագիտական հենքը ձևավորելիս ընտրողական մոտեցում ցուցաբերել: Սակայն հուշարձանների ընտրության սկզբունքը միշտ չէ, որ ակներև է: Թաղման ծեսի հատկանիշների աղյուսակի կազմման համար հեղինակն օգտագործել է Հայաստանի տարածքի ուշ բրոնզ – վաղ երկաթի դարի 21 դամբարանադաշտերի տվյալները, որոնցում, անհասկանալի պատճառներով, ներկայացված չեն ո՛չ Արթիկը, ո՛չ Քարաշամբը, ո՛չ Հոռոմը (էջ 9-10), թեև տեքս-

տում այդ հուշարձանների համապատասխան տվյալները հետագայում ակտիվորեն օգտագործվում են: Ձևաբանեցման համար օգտագործված դամբարանադաշտերի ընտրության հիմքում դրվել է դամբարանների քանակը, որոնց նվազագույն ընդունելի շեմը 10 դամբարան է:

Արդյունքում, 12 դամբարանադաշտի 561 դամբարանների ընտրանին, անշուշտ, շատ ներկայացուցչական է և հուսալի վիճակագրության շնորհիվ ապահովում է եզրակացությունների մեծ մասի օբյեկտիվությունը:

Մեթոդաբանական հենքը.

Մեթոդաբանական սկզբունքներին աշխատանքում նվիրված է ընդամենը հինգ էջ (էջ 9-14): Այնուամենայնիվ, եթե ոչ բաժինն ինքնին, ապա ատենախոսության մեջ Գենինգի, Գենինգի և Բորգունովի մեթոդի կիրարման հետևողականությունը, մոտեցումների միօրինակությունը և ընտրված մեթոդին խիստ հետևելը պայմանավորում են տվյալ ատենախոսական աշխատանքի բարձր գիտական մակարդակը և գիտական արժեքը: Սա ավանդական, հարկադիր սուբյեկտիվ և հաճախ միայն քանակական տվյալների կամ էլ ազգագրական զուգահեռների վրա հիմնված գնահատականներից դեպի վիճակագրորեն հաստատված և մեծ թվով (495)՝ բավականին բարձր օբյեկտիվության աստիճան ունեցող, հատկանիշների վրա հիմնված ցուցանիշներին անցնելու շատ լավ օրինակ է: Հեղինակի կողմից այդ հատկանիշների հիման վրա կազմված՝ Հավելված 2-ը և առանձին դրույթները նկարագրող աղյուսակները (1 – 23), 1 - 21 գծապատկերները ծայրաստիճան օգտակար և տեղեկատվական հենք են, կազմման սկզբունքներով զուգահեռ չունեն մեր գրականության մեջ և, իմ կարծիքով, ինքնին շատ արժեքավոր աշխատանք են:

Սակայն, մի շարք պատճառներով, հեղինակը սահմանափակվել է նյութի ընտրությամբ, որի պատճառով բազմաթիվ հատկանիշների զուգահեռները լիարժեք չեն, ինչը իր հերթին ազդել է տվյալների մեկնաբանության վրա: Արդյունքում, որոշ դեպքերում հեղինակին չի հաջողվել թաղման ծեսի և կառույցների որոշ հատկանիշների դասակարգումը և խմբավորումը, ինչպես նաև մի շարք իրերի

տիպաբանությունը: Այսպես, երկ- և բազմախուց թաղման կառույցները ուսումնասիրելիս, հեղինակը նշում է միայն Լճաշենը և Ծաղկալանջը (էջ 26), անտեսելով Հոռոմի, Գեղարտի և Քանազեղի հրատարակված տվյալները (համապատասխան հրապարակումները բացակայում են նաև գրականության ցանկում): Երկրորդական կառույցների շարքում նշված են միայն երկու տիպեր՝ կրոմլեխին արտաքինից կցված խուց և դամբարանախցի ներսում խորշ (էջ 33): Ըստ երևույթին, հեղինակը համարում է կրոմլեխին ներսից կցված խցերը երկ- և բազմախցանի թաղման կառույցների օրինակ, բայց անտեսում է դրանց տարբեր նշանակության հանգամանքը:

Թվում է, թե առաջին հերթին պետք էր կատարել խցերի պարունակության և նշանակության վերլուծությունը դամբարանի ամբողջ համատեքստում, ապա արդյունքների հիման վրա կատարել կառույցների տիպաբանությունը: Այս դեպքում Գեղարտի դամբարանաթումբ 2-ի կրոմլեխին ներսից կցված խուցը չէր ստանա “սրբազան կենդանու” թաղման կարգավիճակ (էջ 44, կրկնությունը՝ էջ 139), այլ կստանար ավելի ռեալիստական բնութագրություն՝ ուղեկցող գույքի և զոհաբերված կենդանիների պահոց:

Մի շարք արտեֆակտների տեսակների գործառույթների վերակազմությունները միշտ չէ, որ բավականաչափ հիմնավորված են, ինչպես, օրինակ, կեռերի դեպքում (էջ 115): Վերջիններիս բաժանումը կենցաղային, իշխանության խորհրդանիշների և նվիրատվականների՝ ներկայացվում է որպես ակներևություն, առանց բավարար հիմնավորման (միայն վերջին խմբի համար հիմնավորում կարող են հանդիսանալ փոքր չափերը): Ուշ բրոնզեդարյան այնպիսի նշանակալի արտեֆակտների տեսակը, ինչպիսիք են շտանդարտները, ներկայացվում են միայն *pars pro toto* տեսանկյունից, ընդ որում հեղինակը պնդում է, որ ավելի քան երեսուն նմանօրինակ իրերից միայն երեքն են (Արթիկ 3, Վերին նավեր 14 և Քուչակ 31) արտացոլում են տվյալ սկզբունքը (էջ 160): Պարզ չէ, թե ինչու այս տեսակի մեջ չեն մտել բոլոր առումներով նույնանման Արթիկի N 79 (Хачатрян Т. 1979), Մեծամորի X (Khazadian E. 1995), Շիրակավանի N

17 (Թորոսյան Ռ.Մ., Խնկիկյան Օ.Ս., Պետրոսյան Լ.Ա. 2002), Գեղարտի N 3 (Badalyan R.S., Smith A.T. 2017) դամբարանները:

Նման թեմայով աշխատանքում լիովին անհասկանալի է ուշ բրոնզեդարյան այնպիսի սոցիալապես նշանակալի արտեֆակտների տեսակի անտեսումը, ինչպիսիք են միտանական (և միտանական տիպի) գլանաձև կնիքները:

Անհասկանալի է հեղինակի ցանկությունը ներխուժել իր առարկայի հետ անմիջականորեն չառնչվող ոլորտները, որտեղ նա փաստացի սխալներ է թույլ տալիս: Դրանց շարքում է, մասնավորապես, այն պնդումը, որ “Եռոտանի անոթների վաղագույն օրինակները մեզ հայտնի են վաղ կատակոմբային մշակույթում...” (էջ 148), “...եռոտանի անոթները Հայկական լեռնաշխարհում և հարակից տարածքներում հայտնվում են առնվազն մ.թ.ա. XX դարում...” (էջ 150), մինչդեռ հնագույն եռոտանի անոթները Հայաստանում հայտնի էին առնվազն հազար տարի առաջ, կուր-արաքսյան մշակույթի վաղ և ուշ համալիրներում՝ Լճաշեն, Մոխրաբլուր, Գեղարտ, Ամիրանիս-գորա:

Շարադրության թերությունների շարքին պետք է դասել բազմաթիվ կրկնողությունները, այդ թվում բառացիորեն, ամբողջ պարբերություններ (օրինակ՝ բազմափող անոթների դասակարգումը էջ 130 ամբողջությամբ կրկնվում է գլխի եզրակացությունում՝ էջ 168, Արթիկի N 640 դամբարանի նկարագրությունը բառացիորեն կրկնվում է էջեր 109 և 113-ում): Ութ էջ (էջ 101 – 108) տրամադրվել է “Կաշեգործություն, մանածագործություն” գլխին, որտեղ մանրամասնորեն ներկայացվում է Լոռի-Փամբակի երկրագիտական թանգարանի պատահական համալիրների նկարագրությունը՝ լիարժեք գովասանքի արժանի, սակայն միանգամայն անտեղի, ինչը հանգեցնում է ծավալի չարդարացված աճի: Ստուգված չեն տեղանունները՝ Խանքենդի (էջ 49), Լենինական (էջ 123): Կան սխալ հղումներ՝ Badalyan, Smith 2009 (էջ 131)՝ պարզ չէ, թե ինչի մասին է խոսքը, գրականության ցանկում նման աշխատություն չկա: Անհարկի ենք համարում տարածաշրջանից դուրս առանձին զուգահեռներին անդրադարձը՝ Բակուրիս-Մարգիանա (էջ 44), Չուկոտկա (էջ 51), Վերին Օբ (էջ 106):

Ընդհանուր առմամբ, ատենախոսական աշխատանքում հեղինակը դրսևորել է գրականության (ինչպես նշվել է, ցանկում բերված են 423 աշխատանքներ մի քանի լեզուներով), թանգարանային հավաքածուների լավ իմացություն և դրանց բավականին պրոֆեսիոնալ օգտագործում, բայց ամենից առաջ, խիստ մեթոդաբանություն, որի հետևողական օգտագործումը ապահովել է աշխատանքի իրոք գիտական մակարդակը:

Բ.Վարդանյանի ատենախոսությունն ինքնուրույն ավարտուն գիտական աշխատանք է, որն ունի թե տեսական, թե գործնական նշանակություն, և որի եզրահանգումները կարող են նպաստել Հայաստանի ուշ բրոնզ – վաղ երկաթի դարաշրջանի հետազոտումնասիրությանը:

Հեղինակի հրատարակած աշխատություններն արտացոլում են ատենախոսության հիմնական դրույթները: Սեղմագիրն արտացոլում է աշխատանքի հիմնական բովանդակությունը և հիմնական ձեռքբերումները:

Գտնում եմ, որ թեկնածուական ատենախոսությունը բավարարում է ՀՀ ԲՈԿ-ի “Հայաստանի Հանրապետությունում գիտական աստիճանաշնորհման կանոնակարգի” պահանջները, ուստի միջնորդում ենք մասնագիտական խորհրդին Բենիկ Վարդանի Վարդանյանին շնորհել Է.00.03 “Հնագիտություն” մասնագիտությամբ պատմական գիտությունների թեկնածուի գիտական աստիճան:

ՀՀ ԳԱԱ հնագիտության և ազգագրության ինստիտուտի առաջատար գիտաշխատող, վաղ հնագիտության բաժնի վարիչ, պատ. գիտությունների դոկտոր՝ Ռուբեն Սերգեյի Բաղայան

(Handwritten signature)

Ռ.Ս.Բաղայանի կարծիքը հաստատում եմ

ՀՀ ԳԱԱ հնագիտության և ազգագրության ինստիտուտի սնօրենի տեղակալ

Ա.Ա.Բորոխյան _____

